

इवनिंग डोगरी न्यूज़ बुलेटिन

समे .18:15 Hrs

<><><><><><>

Headlines

1. केंद्री गृह मंत्री अमित शाह होरें जम्मू-कश्मीर बारै लाई गेदी इक उच्ची सतह दी बैठक दी प्रधानता कीती।
2. सर्वोच्च अदालत जम्मू-कश्मीर दा राज्य दा दर्जा बहाल करने दी मंग आहली याचिकाएं पर कल सुनवाई करोगा।
3. सेहत मंत्री सकीना इत्तू होरें म्यारी सेहत दिक्खभाल सुविधाएं दी दस्तयाबी लेई सेहत सरबन्धी पेशेवरें दी खरी मानसिक सेहत दे महत्वै पर जोर पाया।
4. जम्मू-कश्मीर सरकारै प्रदेश च ब्लॉक ते पंचैत सतह पर आपदा प्रबंधन कमेटियां खडेरियां न।
5. जम्मू-कश्मीर च एम.जी नरेगा दी अमल-आवरी गी तगड़ा बनाने लेई ग्रामीण विकास विभाग जिला स्तर पर सूचना प्रौद्योगिकी कार्यशालाएं दा सरिस्ता करा'रदा ऐ।

<><><><><><>

HM-Security Review

केंद्री गृह मंत्री अमित शाह होरें अज्ज नमी दिल्ली च इक उच्ची सतह दी बैठक दी अध्यक्षता कीती जेहड़ी जम्मू-कश्मीर केंद्र शासित प्रदेश दी पूरी पराती सुरक्षा स्थिति दी समीक्षा करने लेई सद्दी गेदी ही। बैठका च जम्मू-कश्मीर दे उपराज्यपाल मनोज सिन्हा, केंद्री गृह सचिव गोविंद मोहन, खुफिया ब्यूरो आई.बी दे निदेशक तपन डेका, जम्मू-कश्मीर पुलिस दे प्रमुख नलिन प्रभात, सी.आर.पी.एफ दे महानिदेशक जी.पी सिंह, बीएसएफ

महानिदेशक दलजीत सिंह चौधरी हुंदे अलावा केंद्र ते केंद्र शासित प्रदेश थमां कई बड्डे अफसर बी मजूद हे। बैठक दुरान जम्मू-कश्मीर च आतंकवाद रोधी कारवाइएं दे अलावा पीर पंजाल खित्ते दी सुरक्षा बवस्था ते जम्मू-कश्मीर दे बक्ख-बक्ख हिस्सें च चलै करदी विकास परियोजनाएं दी मजूदा स्थिति दा बी जायजा लैता गेआ। गृह मंत्री होरें जोर देइयै आखेआ जे आतंकवाद खलाफ सरकार दी नीति इसी दना बर्दाश्त नेई करने दी ऐ जेदे कन्नै कोई समझौता नेई कीता जाई सकदा। उनें सब्बने सुरक्षा एजेंसिएं गी निर्देश दित्ता जे ओहू पूरी चाल्ली सौहो सतर्क रेइयै ते आपूं च नेइमा तालमेल बनाइयै कम्म करन तां जे आतंकवाद दा जम्मू-कश्मीर थमां समूलचा नाश कीता जाई सकै ते इत्थे तौले स्थाई शांति दी ब्हाली होई सकै।

<><><><><><>

SC Statehood Petition

सर्वोच्च अदालत जम्मू-कश्मीर दा राज्य दा दर्जा ब्हाल करने दी मंग आहली याचिकाएं पर कल सुनवाई करोग। भारत दे प्रधान न्याधीश हुंदी अदालतै च क्रम संख्या 17 पर एहू याचिकां सूचिबद्द न। इस मामले दी पैरवी करा'रदे एडवोकेट सोइब कुरेशी होरें आखेआ जे एहू मामला कल 10 अक्तूबर गी प्रधान न्यायाधीश हुंदी अगुवाई आहले बेंच अगगे सुनवाई लेई सूचिबद्द ऐ। उनें इब्बी आखेआ जे भारती संघ नै इस मामले पर अजें कोई प्रतिक्रिया दाखल नेई करोआई दी ऐ। ध्यानजोग ऐ जे जंदी 14 अगस्त गी इससै चाल्ली दी इक याचिका पर सुनाई दुरान सर्वोच्च अदालतै आखेआ हा जे जमीनी सतह पर बने दे हालात पर पक्क गै गौर कीता जाना लोइचदा ऐ ते पहलगाम हमले ज्नेही वारदातें दी अनदिक्खी नेई कीती जाई सकदी।

<><><><><><>

Itoo Sports Meet

सेहत ते मेडिकल शिक्षा मंत्री सकीना इत्तू होरें सेहत दिक्खभाल कन्नै जुडे दे पेशेवरें दे शारीरिक ते मानसिक नरोएपन दे महत्वै गी उजागर करदे होई आखेआ जे एहदा म्यारी ते माहिराना सेहत सेवाएं दी दस्तयाबी पर मता असर पौंदा ऐ। श्रीनगर दे बेमिना स्थित सरकारी मेडिकल कालेज श्रीनगर दे जागतें दे होस्टल च आयोजित द'ऊं दिनें दी सलाना खेड्डू मीट दे उद्घाटन समारोह दुरान बोलदे होई मंत्री होरें आखेआ जे डाक्टर ते डाक्टरी दी पढ़ाई करा'रदे विधार्थी स्थाडी सेहत दिक्खभाल बवस्था दी रीढ़ होंदे न, इस करियै उंदी तंदरुस्ती, मानसिक

नरोआपन ते भावनात्मक स्थिरता उन्दे आसेआ प्रदान कीती जाने आहली सेवा पर सिद्धा असर पांदी ऐ। मीडिया कन्नै गल्ल करदे होई सकीना इत्तू होरें आखेआ।

<><><><><><>

Tobaccoo Free Campaign

शिक्षा मंत्रालय नै सेहत ते परोआर कल्याण मंत्रालय कन्नै मिलिये अज्ज तम्बाकू मुक्त युवा अभियान दे त्रीए संस्करण दी शुरूआत कीती। शिक्षा मंत्रालय नै आखेआ ऐ जे राश्ट्री सतह दा एहू अभियान युवा पीढ़ी गी तम्बाकू कोला भलेआं दूर रखने दे सरकार दे उद्देश्य गी हासल करने च मता कारी दा साबत होग। 60एं दिनें दे इस अभियान दा मकसद आम लोकें टकोहदा करियै नोजवानें गी सिगरेट, बीड़ी या तम्बाकू कन्नै बने दे होरनें उत्पादें दे सेवन दे माड़े असर बारै जागरूक बनाइयै उनेंगी इन्दे शा दूर रौहने लेई प्रेरित करना ऐ। जम्मू-कश्मीर दे किश्तवाड़ जिले च बी अज्ज अभियान दे त्रीए गेड़ दी शुरूआत होई जित्थै जागतें दे सरकारी हायर सेकेंड्री स्कूल किश्तवाड़ च तम्बाकू मुक्त भारत विषय पर इक रैली कड़ी गेई। स्कूल दे प्रिंसीपल अशोक कुमार होरें एह्दे बारै आकाशवाणी कन्नै गल्ल करदे होई आखेआ।

<><><><><><>

GST-Reforms Tamilnadu

नमें जीएसटी सुधारें दा लाहू हर कुसै गी होआ'रदा ऐ। अज्ज अस गल्ल करगे इस नमें सुधार कन्नै तमिलनाडू दी समृद्ध दस्तकारी गी कियां लाहू होआ'रदा ऐ। नमें सुधारें तैहत बुने दे कपड़े, कढ़ाई, जरी कांचीपुरम सिल्क ते होर दुइएं चीजें पर जीएसटी 12 फीसद थवां घटाइए 5 फीसद करी दित्ता गेआ ऐ। इस्सै चाल्ली लकड़ी कन्नै बने दे उत्पाद, रिवायती खडोने पर बी हुन 5 फीसद जीएसट लग्गग। एह्दे कन्नै इस कम्मै कन्नै जुड़े दे कारीगरें ते लोकें गी लाहू पुज्जग। इस्सै चाल्ली मच्छीपालन ते एह्दे कन्नै जुड़े दे होर लोकें गी बी नमीं दरें दा लाहू होआ। डब्बा बंद मच्छी ते सीफूड पर हुन 12 फीसद दे बजाय 5 फीसद टैक्स लग्गग।

<><><><><><>

Disaster Management Committee

जम्मू-कश्मीर सरकारै पूरे केंद्र शासित प्रदेश च कुदरती करोपिणं दे खतरे कन्नै निब्वडने गितै तैयारिणं गी निगगर बनाने लेई ब्लॉक ते पंचैत दौनें सतहें पर आपदा प्रबंधन कमेटियां कायम करने दा हुक्म जारी कीता ऐ। ब्लॉक सतह पर कमेटी दी अध्यक्षता ब्लाक विकास काउंसल दे चेयरपर्सन करडन जिसलै जे तहसीलदार, बी.डी.ओ ते बाल विकास प्रोजेक्ट अफसर एहदे मिम्बर होडन। कमेटी दे मिम्बरें च होर मैहकमें दे अधिकारी बी शामिल होडन जियां ग्रामीण विकास मैहकमे दा इंजीनियरिंग सीगा, जल शक्ति, बिजली विकास, पी.डब्ल्यू.डी, ब्लॉक मेडिकल अफसर, जेड.ई.ओ ते अकाउंट्स ते स्टैटिस्टिकल अफसर बगैरा एहदे अलावा द'ऊं नामजद सरपंचें ते अगग स्थालने ते आपात सेवाएं दे इक प्रतिनिधि गी बी एहदे च शामिल कीता जाहगा।

<><><><><><>

Workshop IT Initiatives

महात्मा गांधी राष्ट्री ग्रामीण रोजगार गरंटी कनून एम.जी-नरेगा दी अमल आवरी च आधुनिकता बक्खी अगड़े लैदे होई ग्रामीण विकास ते पंचैती राज मैहकमा सूचना प्रौद्योगिकी सरबन्धी पैहलकदमिणं दे बारै च जिला सतह पर कई कार्जशालाएं दा सरिस्ता करै करदा ऐ ते पूरे केंद्र शासित प्रदेश च रिकार्ड दा रख-रखाव बी सूचना टेकनालजी दे आधार पर कीता जा'रदा ऐ। मैहकमे आसेआ लोआई जाने आहली क्षमता निर्माण कार्जशालाएं दा मकसद फील्ड अमले ते सरबन्धित होरनें हितधारें गी डिजिटल मंचें जियां कि युक्तधारा, ई-केवाईसी, ई.एम.बी माड्यूल, जियो फेंसिंग ते एन.एम.एम.एस दे बारै च जानकारी दिती जंदी ऐ। इस सिलसिले च अनंतनाग कुलगाम, शोपियां पुलवामा, उधमपुर, रामबन, डोडा किश्तवाड़, जम्मू रियासी, राजौरी पुंछ ते बारामुला बांडीपोरा जिले च इस चाल्ली दियां कार्यशालां पैहले गै लोआई लैतियां गेदियां न।

<><><><><><>

Poshan Maah

बच्चें ते उंदी मावरी च खुराक दे पैमाने च सुधार सरबन्धी पोषण माह अभियान जम्मू-कश्मीर दे सब्बनें जिले च मते जोश ते निष्ठा कन्नै मनाया जा'रदा ऐ। इसै सिलसिले तैहत रामवन जिले च सब्बे आंगनवाड़ी केंद्र संगठित बाल विकास सेवाएं तैहत विशेष जागरूकता कैंप लोआ करदे न जिंदे च मुख्त तौरा पर ध्यान किशोर उम्री दिएं बच्चिएं, पटेयाली महिलाएं, 6 ब'रें तोड़ी दी उम्री दे बच्चें ते बच्चें गी अपना दुध पलेयाने आहली मावरीं दी खुराक पर दिता जा'रदा ऐ। एहदे अलावा उंदा टीकाकरण, शुरूआती शिक्षा, सेहत सरबन्धी लाहें बारै बी चेचे तौरा पर गल्लबात ते रिकार्ड रक्खेआ जा'रदा ऐ। इस बारै आकाशवाणी कन्नै गल्ल करदे होई बनिहाल थमां इक लाभार्थी असमा ते चरील थमां जुबैदा दा आखना हा।

<><><><><><>

CEO-Kishtwar Order

किश्तवाड़ दे मुख्त शिक्षा अधिकारी होरें इक हुक्म जारी करियै स्कूली शिक्षा मैहकमे दे मलाजमें गी बिजन डी.डी.ओ दी पेशगी परमिशन लैते दे सी.ई.ओ दफ्तर नेई औने दी ताकीद कीती ऐ। इस बारै जारी सर्कुलर च आखेआ गेआ ऐ जे किश टीचर ते गैर शैक्षणिक अमला बिजन कुसै जायज कम्मै दे सी.ई.ओ दफ्तर दी फराजी लाने पुज्जे दे होंदे न, एहू गल्ल अकसर दिक्खने च आवा करदी ऐ जेदे नै उत्थे प्रशासनिक ते शैक्षणिक कम्में पर असर पौंदा ऐ। इस करियै जिस कुसै मलाजम गी सी.ई.ओ दफ्तर कोई कम्म होऐ ओहू बाकायदा डी.डी.ओ कोला पैहले एहदे लेई परमिशन लेइयै गै उत्थे जा। इस बारै होर मती जानकारी दिंदे होई सी.ई.ओ किश्तवाड़ संजय डोगरा होरें आखेआ।

<><><><><><>